

『類聚三代格』17 貞觀三年六月十六日太政官符（應用長慶宣明曆經事）

太政官符

應用長慶宣明曆經事

今案推古天皇御代也〔朱〕

右陰陽頭從五位下兼行曆博士大春日朝臣眞野曆辨狀稱。謹檢古記。豐御食炊屋姬天皇十年壬戌冬十月百濟僧觀勒來貢曆術。而未行於世。高天原廣野姬天皇「天平寶字」四年庚寅冬十二月。有勅始用元嘉曆。次用儀鳳曆。高野姬天皇天平寶字七年八月停儀鳳曆。用開元大衍曆。厥後寶龜十一年遣唐使錄事內藥正從五位下羽栗臣翼貢寶應五紀曆經。申云。大唐今停大衍曆。唯用件經者。天應元年有勅令據件經造曆。無人習學。不得講成。猶據大衍曆經。勘造曆日。已及百年。眞野曆去齊衡三年申請可以五紀曆作曆之狀。而太政官四年正月十七日符稱。國家據大衍曆經。作曆尚矣。去聖已遠。義貴兩存。宜暫相副令作進者。依件符旨。大衍五紀相副作進二箇年也。去貞觀元年渤海大使烏孝慎新貢長慶宣明曆經言。是大唐新用經也。眞野曆試加覆勘理當固然。仍以件新曆。比校大衍五紀等兩經。且察天文。且參時候。兩經之術。漸似龜踈。令朔節氣。既有相差。又勘大唐開成四年大中十二年等曆。不復與彼新曆相違。曆議曰。陰陽之運。隨動而差。差而不已。遂與曆錯者。方今大唐開元以來三改曆術。而我國天平以降。猶用一經。靜言事理。實不可然。望請。停舊用新。欽若天步。謹請。官裁者。右大臣宣奉勅。依請。